

**TE RAU TAU O TE WAIMATE.**

Ki te Toa Takitini: Mau e toha haere ki nga marae o te Motu enei korero. A tenei tau e heke iho nei, 1930, ka huri te Rau tau o te Waimate; ara te whakanohanga e te Matenga me nga kaunatua o te Hahi i tenei kainga i te Waimate. hei pou tokomauawa mo nga mahi, me nga whakahaere o te whakapono ki runga ki te Motu katoa i aua ra.

I te hui i tu ki te Waimate tata ake nei: i reira te Akepihopa. I whakaritea me waiho te Ratapu. 12, onga ra o Hanuere 1930 hei ra whakawhetai nui, ki te Waimate ma te Motu katoa, Maori, Pakeha: a me hanga kia oti mo taua ra he Keeti (Lichgate) kohatu, me tetahi whakamaharatanga ki roto o te whare karakia. hei tolu whakamaharatanga kia te Matenga, me nga mihingare tuatahi.

No te hui a te Komiti Timuaki mo te taha Maori o te Pihopatanga o Akarana, i noho ki Kaikohe, i reira te Pihopa o Aotearoa, ka whakaritea ko taua Komiti tonu hei komiti whakahaere i tenei putake i roto o te taha Maori. I panuitia hoki i roto o taua hui te reta mai a te Akepihopa, kia whai waahi te taha Maori i roto i nga whakahaere, me nga whakaaro o taua ra nui. Na reira ka tukua atu nei ma te Toa Takitini e whakapaoho haere ki runga ki nga marae o te Motu tenei take nui. Ko nga whakaaro o nga iwi mo runga i tenei putake me tuku mai ki au.

W. N. Panapa.  
Hekeretari Komiti Whakahaer,  
Kaikohe.

**PITOPITO KORERO.**

Kua tu ko te Ropu Kai-mahi hei kawanatanga mo te katoa o Poihakena.

Kua kitea ko etahi o nga paanga mai o te mate Taipopiwa i matapuna mai i te kainga Tio (oysters).

I enei marama tata ake ka kitea na te kai merengi i rongoatia ki nga mea "whakamomona" te putake o te mate Koiango.

I mea a te Hiima, upoko o te taha Maori o te Hahi Weteriana, i taana whai korero i Hamutana: he mea whaka pungako noa te rongo rarurau mai o nga wahine Maori me nga Hainamana o Akarana.

Nuku atu i te 2000 mairo, mai i tetah pito ki tetahi moka te roa o te pihopatanga o Merenihia.

E kingia ana o te hunga i tae ki te whare porangi i Porirua, nuku atu i te 4000 he hunga i whanau tonu ki konei. e 2000 he hunga whakaeke, 17 he Inia he Hainamana.

Ki te 7 o Oketopa nei 1,207,200 te hunga kore mahi o Ingarangi. E 112,506 te hokinga iho i o te tau ka hori.